

LA PAIX

100

EN

SON THROSNE
DE GLOIRE,

OV

LA CORNE D'ABONDANCE

*apportée du Ciel à tous les bons François,
par l'Ange Tutelaire de ce Royaume.*



A PARIS,

Chez PIERRE VARIQVET, rue S. Iean de Latran
deuant le College Royal.

M. DC. XLIX.

AVEC PERMISSION.

CASE

F

39

326

1649 p2

THE NEWBERRY
LIBRARY



50-2747

LA PAIX EN SON THROSNE DE GLOIRE,

OV LA CORNE D'ABONDANCE
*apportée du Ciel à tous les bons François, par l'Ange
Tutelaire de ce Royaume.*



A Paix est vne Deesse si venerable, & si glorieuse, que toutes les beatitudes naturelles des hommes ne sçauroient estre qu'imparfaites sans ses graces. Les Diuinitez les mieux faifantes de tout le Paganisme, ne sçeurent iamais receuoir ny vne equitable oblation, ny vn Cantique bien concerté de ceux qui les idolatroient, que par son entremise. Ce n'est que par le ministere de cette incomparable Deité tant desirée, que ces autres filles du Ciel se peuuent rendre considerables parmy nous, & parmy toutes les Nations de la terre. C'est à vray dire l'objet le plus consideré des mortels, & le Dieu des felicitez passageres. Si tout l'estre créé luy vouloit dignement reconnoistre ses biens-faits, il luy consacrerait ce qu'il a de plus precieux & de plus rauissant dans l'une & l'autre de ses especes. Les Romains aussi bien que les habitans d'Athenes, après luy auoir fait eriger des Temples, dans toutes les places de leurs Republicques, placerent son image sur vn Autel si somptueux & si magnifique, que les siecles n'ont iamais veu rien de si charmant, ny de si superbe. Pluton Dieu des Richesses estoit auprès d'elle, qui luy sacrifioit tous ses tresors, & qui luy rendoit des venerations extraordinaires. Cere s'humilioit deuant sa Majesté, pour mieux receuoir ses benedictions & ses influences. Et pour glorifier encore dauantage cette adorable Pacifique, les Charites traualloient incessamment à luy faire des hecatombes solempnels, de tout ce que la Nature animale auoit de plus excellent, en reconnoissance de la douceur, & de la benignité dont elle vsoit enuers des Vierges si rauissantes. Amaltée, nourrice de Iupiter, se prosternoit à ses pieds, & luy faisoit vne offrande eternelle de ce qu'elle auoit de plus exquis, & de plus admirable. Enfin tous les plus iudicieux

& tous les plus raisonnables de l'Vniuers ne la considerent maintenant que comme vne image mysterieuse de l'Estat Angelique.

Se peut-il voir quelque chose dans le monde, qui puisse mieux appuyer la dignité du Souuerain, ny qui puisse mieux eterniser sa memoire? Qu'est-ce qui le peut faire plus amoureux-ement cherir de ses Sujets? Et qu'est-ce qui sçauroit mieux entretenir les Princes & les Peuples dans vne vnion plus parfaite? Iugez-vous après cela qu'un Monarque se puisse rendre plus chery & plus assésuré par ses cruantez, que par les puissantes inclinations qu'il doit auoir à bien faire? La Paix n'est pas moins necessaire à celuy qui commande dans un Estat, qu'à ceux qui doiuent viure sous ses loix, & sous sa conduite? La Paix est l'ame vegetatiue de l'interest public, & le port de Salut de tout ce que la Nature sçauroit produire? C'est par elle que les champs abondent en fruiets, & que les villes sont munies de toutes sorte de viures. C'est par elle que les Loix sont en vigueur, & que les Republiques sont florissantes. C'est par elle que Dieu se trouue pieusement reueré, & que la Iustice est religieusement obseruée. C'est par elle que tous les Pauures sont soulagez, & que les riches prosperent. C'est par elle que la ieunesse apprend la Vertu, & que les vieillards sont en estime. Et c'est par elle que les animaux priuez de raison trouuēt un refuge assésuré parmy les hommes; que les Elemens subsistent dans un mutuel accord, & que tout le monde se tient vniuersellemēt dās vne parfaite harmonie. Et quoy que les vns soient naturellement pourueus d'armes offensives, & que les autres soient douez de plusieurs qualitez contraires, ils ne laissent pas de s'vnir en Paix, & d'obeir aux Decrets de sa Prouidence infinie. Gedeon fit construire un Autel qu'il appelloit la Paix du Seigneur, & Iesus Christ touché de pitié fût contraint de verser des larmes sur la ville de Ierusalem, lors qu'elle ne voulut pas deffiller les yeux en faueur de la Paix, que ce diuin Seigneur vouloit donner à son peuple. Ne nous a-t'il pas donné des bras pour nous acoler en signe de Paix, & le sentiment du baiser pour se tesmoigner de l'amitié les vns aux autres? La Raison est vne faculté de l'ame qui nous doit obliger plustost à suiure les graces de la Paix, que les malheurs du desordre. La Morale est vne science inuentée pour moderer les salies de l'esprit & pour porter nostre entendement à la Paix interieure de l'ame. Et quoi que les passions des hōmes soient d'une nature à

ne

Lue. 19. 42.

Iug. 6. 24.

pouuoir iamais supporter des regles, & mesmes à se declarer ou-
 uertement les ennemis iurez de la Paix, que l'ame & le corps doi-
 uent inuiolablement conseruer l'un pour l'autre; elles ne laissent
 pas d'estre prudemment humiliées par la conduite de la Raison,
 & de s'accommoder à la Paix que nostre entendement leur aura
 prescrite. Enfin, si nous voulons curieusement examiner toutes
 les conditions de cette vie mortelle, nous n'en trouuerons pas
 vne qui puisse subsister long-temps sans Paix, ou du moins sans
 quelque espece de concorde, tant cette felicité se trouue ne-
 cessaire dans tous les estres. L'amitié conjugale, quelque sainte
 quelle puisse estre, se destruiroit insensiblement, malgré tous
 les appas dont l'amour se sert ordinairement pour la faire subsi-
 ster, si la Paix ne la mettoit à couuert des atteintes de cette fata-
 le Déesse, qui ietta la pomme de discorde aux nopces de Pelée.
 Enfin ie ne voy chose quelconque qui puisse tomber sous nos
 sens, qui ne nous conuie à la Paix, & qui ne nous accuse vn iour
 deuant Dieu, d'auoir seulement songé à se mettre en estat de
 verser le sang de ses freres. Et quoy que la Paix ne nous soit en-
 uoyée du Ciel que pour l'usage des hommes; si est-ce pourtant
 que toute la France ne semble pas estre encore à la fin de toutes
 ses miseres.

La Iustice inspirée de Dieu, n'est-elle pas occupée à donner
 la Paix à ceux que l'interest particulier traueille à mettre en des-
 ordre? Les Citoyens d'une mesme Ville ne sont-ils regis par
 mesmes Loix, & ne vivent-ils pas dans vne certaine Vnion
 parfaite? Les familles peuuent-elles subsister que dans vne con-
 corde inuiolable? Le mary & la femme, en quelle vnion ne vi-
 uent-ils pas dans la foy conjugale qu'ils se sont promise? Ces in-
 signes Legislaturs, de qui nous auons des decrets si venerables,
 ne s'exercent-ils pas iour & nuict à la decision des affaires com-
 munes, generales, & politiques? Les Philosophes ne dépouil-
 lent-ils pas leur Sage de toute sorte de passions pour le faire sub-
 sister en Paix, tout autant qu'il leur est possible? La Morale n'est-
 ce pas vne science qui nous instruit à bien viure, afin de nous ap-
 prendre à bien mourir, qui sont à vray dire les deux voyes les
 plus asseurées pour nous faire iouyr en Paix & de la vie passagere
 & de la vie eternelle? La Politique ne vise-t-elle pas en toutes ses
 fins à tenir le Prince & ses Sujets dans vne tranquillité publi-
 que? Les maximes d'Estat ont-elles d'autre but que la Paix: & la
 Guerre, mesmes s'entrepren-d-elle iamais que pour nous don-

1. Cor. 3. 13.

1. Cor. 14. 33

1. Sam. 25. 6.

2. Cor. 13. 11.

Rom. 5. 17.

Ephes. 1. 2.

Thes. 3. 12.

Isa. 22. 4.

Exod. 2.

Esa. ch. 9.

Ps. 17.

Ps. 75.

1. Cor. 13.

Rois 17.

ner vne Paix assurée? Les Ecclesiastiques, qui sont les veritables Ministres de la Parole de Dieu, doivent-ils jamais prescher que la Paix vniuersellement à tous les hommes, puis qu'ils doivent receuoir vn salaire condigne à leurs merites? La Noblesse peut-elle fleurir dans les biens & dans les Lettres, que par son ministere? Et le tiers Estat, qui n'est qu'un composé de Bourgeois, d'Artisans, de Laboureurs, & de quelque autre sorte de personnes, le plus souuent inutiles à la Republique, peut-il subsister que par le moyen d'une Paix bien estable, ainsi que nous auons veu depuis peu de iours dans la ville capitale de ce Royaume? Le Sacrifice Propiciatoire, & le Sacrifice Pacifique, ne furent-ils pas instituez de Dieu en la Loy de Moysé en action de graces de ce que ce diuin Createur auoit donné la Paix à ses creatures? La Theologie, qui est vne science des choses Diuines, nous presche t'elle autre chose que la Paix, dans tous les Documents qu'elle nous donne? De tous les plus beaux attributs dont Dieu se glorifie, il ne fait estat que de celuy de Dieu de la Paix, ordonnant aux Hebreux aussi bien qu'à ses Disciples de ne se saluer jamais qu'elle ne fut de la partie? Saint Paul ne preschoit aux Corinthiens que de viure en Paix & en concorde? Iosué ne souhaitoit que la Paix à son Peuple? Et Moysé ne tachoit qu'à mettre la Paix entre les vns & les autres? Les Mysteres de la Religion Catholique, Apostolique, & Romaine, furent-ils instituez de ce diuin Principe de Paix, que pour donner la Paix à toutes les Nations de la Terre? Et Iesus Christ mesme, humiliat'il sa sainte & sacrée personne, à se reuetir de nostre nature, & à mourir en Croix pour le salut des hommes, que pour establir vne Paix eternelle entre la diuine Majesté, & des mortels ingrats à tant de graces qu'il luy a pleu de leur faire? Ne dit-il pas en Esaye que les Peuples ne se doivent plus esleuer contre les Peuples, & que les Batailles seront inutiles, parmy les Habitans de la Terre? Le Prophete Royal David ne nous assure t'il pas que la Iustice & la Paix doivent regner par tout l'Vniuers, apres l'Incarnation du Verbe? Ce qu'il confirme encore dans vn autre passage, lors qu'il dit, que le lieu où il doit estre a esté fait en Paix, afin qu'il peult mieux traualler pour le salut de tout le Monde. Et le diuin Apôstre, ne prefere t'il pas la Paix au reste de tous les dons celestes? Dieu ne voulut pas que David luy fit eriger vn Temple, à cause qu'il estoit encore tout sanglant des Nations qu'il auoit fait passer au tranchant de l'espee, quoy qu'il ne se fut porté à les exter-

miner & à les defaire, que par les commandemens que sa diuine Sageſſe luy en auoit fait luy-meſme? Si vne guerre entrepriſe par vn Decret inuiolable, comme celuy de ce Souuerain Seigneur, fut capable de mettre ce genereux Prince en quelque eſpece de diſgrace, que ne feront pas toutes celles que la vanité ou l'intereſt particulier, nous fait faire contre nos parens, nos allies, & nos compatriotes, pour aſſouir la rage & la cupidité de ceux qui en ſont la cauſe? Si vn Roy que Dieu trouuoit ſelon ſon cœur, & qui n'auoit pris les armes que pour ſa gloire, par ſes ordres, & pour la deſenſe de ſa cauſe, ſe trouua ſouillé deuant ſa diuine Maieſté, d'auoir eſpanché le ſang des Peuples qui eſtoient meſme dans ſa haine, & qu'une equitable reprobation expoſoit à la fureur de ce Prince; quelle ſource de grace ne faudra-t'il pas que Dieu faſſe ruiſſeller de ſa diuine miſericorde, pour lauer l'énormité des crimes de ceux qui traittent injuſtement ſes ſeruiteurs & leurs propres freres, avec des cruautéz ſi prodigieuſes? Ce diuin Sauueur de nos ames n'a reſpandu ſon ſang que pour conſeruer le noſtre, contre les maximes du ſiecle. Cét vnique Reparateur de la Nature pouuoit bien enuoyer vn deluge vniuerſel de feu & de flamme ſur toute la terre, pour ſe venger des outrages qu'il auoit receus des hommes: mais il aima mieux s'expoſer luy-meſme à la mercy de toutes les rages infernales, & employer les traits de ſa Clemence ſur des ames ſi criminelles pour leur ſalut, que les foudres de ſon indignation ſur des objets plus dignes de ſa pieté que de ſa colere pour les perdre. Conſideréz vn peu de grace ie vous ſupplie, chers enfans de l'Egliſe Chreſtienne, quel fut le regne de Ieſus Chriſt, lors qu'il viuoit en homme mortel parmy ſes Peuples; & venez après cela faire vne ſainte reflexion ſur le voſtre pour bien iuger ſ'il eſt comme le ſien, & ſi vous deuez pratiquer des maximes ſi funeſtes à voſtre ſalut, & ſi ingenieufes à voſtre perte. Vous n'ignorez pas que ce ne ſoit le vray modelle de tous ceux qu'il a gratuitement tirez du neant, & ſur lequel vous deuez former toutes vos actions, & regler toutes les paſſions de voſtre ame. Les Anges ne furent pas enuoyez ſur terre pour y publier les trophées & les victoires qu'il s'eſtoit acquiſes avec le trenchant de l'eſpée; ces chers & redoutables eſcadrons de ſa Toute-puiſſance, n'entonnerent iamais par tout l'Vniuers que des Cantiques de ſa Paix, & des Hymnes de ſon amour & de ſa grace. Auſſi n'approchoit-il iamais perſonne qu'en luy faiſant vn ſalut de Paix, qu'on pouoit prendre avec raiſon, pour le prin-

Luc' 2. 14.
19. 38.

Matt. 10.

Ican 13.

Matt. 5.

cipe de toutes ses graces. Les Apostres à son imitation pratiquoient aussi la mesme façon d'agir, vniuersellement avec tout le monde. Toutes les Epistres qu'ils escriuoient aux Peuples, ne portoient en teste que des Exordes ou des Prefaces de cette nature. Et Iesus Christ leur prêchoit qu'ils ne seroient iamais reconnus pour estre à luy s'ils ne viuoient bien en Paix les vns avec les autres. Voila les armes qu'il donne à ceux qui veulent combattre sous ses Estendars, & qui veulent auoir l'honneur d'estre du nombre de ses Athletes. Voila les marques par lesquelles il veut que ses Eleus different de ceux que sa reprobation a déjà banny de ses graces. Si Iesus Christ nous commande de pardonner à ceux qui nous ont offensez avec la mesme charité que nous voulons qu'il nous pardonne, que deuiendront ceux qui par vne offense bien legere, excitent tant de desordres parmy leurs freres, en comblant l'Vniuers de terreur & de carnage? Le Ciel n'est deu qu'à ceux que l'on afflige de guerre & de concussions, & que l'on priue des heritages, & des possessions terrestres? Sa diuine Majesté nous commande, de ne luy consacrer chose quelconque que ce puisse estre, que nous ne nous soyons premierement dépouilleez de toute la haine que nous scaurions auoir pour nostre prochain, & que nous ne nous soyons purifiez de toutes les mauuaises impressions que cette contagieuse nous pouuoit auoir infusées en l'ame. Cét equitable & souverain Seigneur, veut absolument que nous fassions tout ce qui nous sera possible pour nous reconcilier avec nos ennemis, deuant que iamais nous preparer à luy faire aucun sacrifice? Considérez de grace avec qu'elle seuerité il traita saint Pierre, lors qu'il mit l'espee à la main pour le defendre des violences que les Juifs exerceoient contre leur Createur, & contre celuy qui se venoit exposer à la mort pour leur redonner la vie. Ne chassa t'il pas les Anges du Ciel pour n'auoir pas voulu demeurer en Paix dans la Beatitude qu'il leur auoit preparée. Et vous voudriez apres cela qu'il laissast viure les hommes dans vn crime bien plus funeste, & bien plus sanglant, sans leur faire Iustice. Nous luy demandons nostre pain quotidien, & nous faisons continuellement tous nos efforts, pour l'oster à nos freres, & par la guerre & par les subsides. Nous voulons qu'il nous pardonne nos pechez, & nous remplissons l'Vniuers de legions estrangeres, pour nous venger d'un affront mal conceu, & d'une iniure bien legere. Nous le prions de nous deliurer du mal & nous remuons la Terre & le Ciel pour accabler nos semblables.

F I N.